

佛說分別布施經

宋西天三藏朝奉大夫試鴻
臚卿傳法大師施護奉 詔譯



南無本師釋迦牟尼佛

說明

本繁體校正版《佛說分別布施經》電子書，根據《乾隆大藏經》宋元入藏諸大小乘經，第 0925 部，宋西天三藏朝奉大夫試鴻臚卿傳法大師施護奉詔譯《佛說分別布施經》原藏影印本校正，句讀僅供參考。

本電子書是免費結緣品。特此說明。

仁慧草堂

二〇一九年九月



掃碼關注仁慧草堂微信公眾號

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

淨口業真言

(三編)

唵. 修唎. 修唎. 摩訶修唎. 修修唎. 薩婆訶.

淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

普供養真言

(三編)

唵. 誝誝曩. 三婆嚩. 禡日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇
我今見聞得受持 願解如來真實義

佛說分別布施經

宋西天三藏朝奉大夫試鴻

臚卿傳法大師施護奉 詔譯¹

如是我聞：

一時，佛在釋種住處迦毗羅城尼拘陀樹園，與苾芻眾俱。

爾時，有一苾芻尼，名摩訶波闍波提，持新氎衣，來詣佛所。到佛所已，頂禮佛足，退住一面，即白佛言：「世尊！此新氎衣我自手作，奉上世尊，惟願納受，令我長夜得大利樂。」

爾時，佛告摩訶波闍波提：「汝可持此氎衣施諸大眾，所獲勝利同供養我等無有異。」

是時，摩訶波闍波提苾芻尼重白佛言：「我本發心，唯為世尊故造此衣，願佛納受，令我長夜得大利樂。」如是三復慇懃勸請，佛亦如是三復答言：「但當平等施諸大眾，所獲勝利與我無異。」

是時，尊者阿難侍於佛側見是事已，前白佛言：「世尊！此摩訶波闍波提苾芻尼，是佛之親，

¹ 大正藏：西天譯經三藏朝奉大夫試鴻臚卿傳法大師臣施護奉 詔譯

有大恩德，唯佛自知。此所奉衣，佛為納受，今正是時，令摩訶波闍波提於長夜中得大利樂。」

佛言：「阿難，如是！如是！此摩訶波闍波提是吾之親，有大恩德，我亦自知。今自手造衣來施於我，甚為難事。何以故？阿難，當知所有補特伽羅能起淨信心，歸依佛法僧者甚為難事；又復能持不殺、不盜、不婬、不妄、不飲酒等近事戒法，如是補特伽羅轉復難作，何況於佛世尊合掌恭敬而行布施，施已淨信，於佛無疑及法、僧伽亦無疑惑，乃至苦、集、滅、道四聖諦理，永斷疑見！阿難，今此摩訶波闍波提苾芻尼，能起淨信心歸依佛、法、僧，受持不殺、不盜、不婬、不妄、不飲酒等近事戒法，而能於佛及法、僧伽，乃至苦、集、滅、道四聖諦理，已斷疑惑，此苾芻尼難作能作，佛亦自知。

「阿難，有十四種較量布施。何等十四？一者，於病苦人而行布施；二者，於破戒人而行布施；三者，於持戒人而行布施；四者，於離染人而行布施；五者，於須陀洹向而行布施；六者，於須陀洹果而行布施；七者，於斯陀含向而行布施；八者，於斯陀含果而行布施；九者，於阿那含向而行布施；十者，於阿那含果而行布施；十

一者，於阿羅漢向而行布施；十二者，於阿羅漢果而行布施；十三者，於諸緣覺而行布施；十四者，於如來、應供、正等正覺而行布施。阿難，汝今當知：施病苦人獲二倍福；施破戒人獲百倍福；施持戒人獲千倍福；施離染人獲百千倍福；施須陀洹向獲無量福，何況須陀洹果！施斯陀含向獲無量福，何況斯陀含果！施阿那含向獲無量福，何況阿那含果！施阿羅漢向獲無量福，何況阿羅漢果！施諸緣覺獲無量福，何況如來、應供、正等正覺！如是名為較量十四種布施功德。

「復次，阿難，當知布施大眾有其七種：一者，施佛現前諸苾芻眾；二者，施佛滅後諸苾芻眾；三者，施佛滅後苾芻尼眾；四者，施佛滅後苾芻、苾芻尼二眾；五者，施佛滅後遊方行化諸苾芻眾；六者，施佛滅後遊方行化苾芻尼眾；七者，施佛滅後遊方行化苾芻、苾芻尼二眾。如是名為七種大眾，當行布施。

「復次，阿難，當知有四種布施清淨。何等為四？一者，能施清淨即無受者；二者，所施清淨即無受者；三者，能受清淨即無施者；四者，所受清淨即無施者。阿難，何名能施清淨即無受者？謂由施者不取其相，即身業清淨、口業清淨、

意業清淨，正命清淨，見亦清淨，如是具足即無施相，以無施故即無受者。若施者有所見相，即身、口、意三業不清淨，命亦不清淨，見亦不清淨；若離是相，即施者受者二皆清淨。

「又復，何名所施清淨即無受者？若受者身業不清淨、口業不清淨、意業不清淨，命不清淨，見不清淨，即有所施相；若受者三業清淨，命清淨，見清淨，如是具足即無所施相，由離相故即所施清淨。

「又復，何名能受清淨即無施者？若受者身、口、意三業不清淨，命不清淨，見不清淨，即有能受相；若離是相即無施者。

「又復，何名所受清淨即無施者？謂由施者三業清淨，命清淨，見清淨，即無所施；由離施故即無所受，是故所受清淨。阿難，若能如是了知，即得四種布施清淨。」

爾時，摩訶波闍波提苾芻尼聞佛宣說種種布施法已，即持是衣施諸大眾。是時，諸苾芻眾即為納受。

佛告阿難：「於當來世若有信心善男子等，能於大眾起淨信心而行布施者，當知是人獲福無量，何況於今現在行施？」

爾時，尊者阿難及摩訶波闍波提苾芻尼聞佛說已，歡喜踊躍，信受奉行。

佛說分別布施經

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

補闕圓滿真言

(三編)

唵. 呼嚧呼嚧. 社曳穆契. 莎訶

普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫
迦囉嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無觀世音菩薩摩訶薩 (合掌三稱)

南無護法諸天菩薩 (合掌三稱)

禮佛發願文

(一編)

歸命十方調御師 演揚清淨微妙法

三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一編)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

十方三世一切佛。一切菩薩摩訶薩。摩訶般若波羅蜜。

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。

南无护法韦驮尊天菩萨



此咒置經書中可滅誤跨之罪